

長文襄公自定年譜

九年己丑七十二歲

正月恭錄

御賜

御製正月二十二日有作

風送輕寒雪後天優沾春澤報章連迴思昨歲今朝
事正是紅旗露布傳 去歲邊陲方戮力今春喜見

兩公侯

天慈敬籲調陽雨侍

輦陪都諏仲秋

二月復充

經筵講官

三月署兵部尙書

四月署吏部尙書充

殿試讀卷大臣

六月署正藍旗滿洲都統

七月管理健銳營事務

御賜

仁宗睿皇帝聖訓二十函

八月扈

蹕盛京

十月旋京

十一月

御賜巡幸盛京詩全冊

十二月二十五日

賜迎祥二字

是年子桂輪奉

旨補授武備院卿調鑲黃旗護軍統領陞兵部右侍

郎調鑲藍旗滿洲副都統管理新舊營房冰鞋
處補授喜起舞大臣署理對引大臣又扈

蹕盛京

上於蓮花背途次行營

御射連中四矢以武備院預備弓箭合式桂輪蒙

恩賞穿黃馬褂

十年庚寅七十三歲

正月

御賜

御製詩初集二函

五月奉

旨署戶部尙書步軍統領

九月十三日奉

旨頒給欽差大臣關防前往回疆督辦軍務並

命桂翰隨往

十五日啓行

二十八日山西北相鎮途次具

奏疊奉

廷寄並鈔示常德等奏摺知喀什噶爾城垣尚在
堅守卡內回子未盡從逆各布魯特亦多觀望
並蒙

諭額爾古倫等不得妄行出卡邀功臣惟有星夜遄
行以期早日趕赴喀什噶爾相機籌辦奉

硃批刻下日漸寒冷諸凡慎重早抵回疆復成大功
朕佇望捷音等因欽此

十月初三日陝西乾州途次具

奏連奉

廷寄並鈔示玉麟壁昌等奏摺各一件知喀什噶爾英吉沙爾現在固守臣查博巴克卽前次大兵收復葉爾羌之時先行逃出卡外之逸犯膽敢糾約前來滋擾實屬罪大惡極刻下葉爾羌已獲勝仗正好乘勝勦辦兵貴神速臣一面奏明一面飛咨各城大臣相度機宜妥速辦理奉硃批卿所見與朕相同但恐該逆狡獪異常兵到則遁耳等因欽此

二十六日肅州途次具

奏疊奉

廷寄並鈔示玉麟壁昌等奏摺知各路所報情形

不一總須接仗後方能得其實在根由臣二十

七日出關計所調官兵已共三萬有奇似足敷

用所有楊遇春添派陝甘兵數如將來必需調

用一面知會迅速派往如賊衆逃散卽酌量情

形陸續停止奉

硃批隨時酌量可也欽此

十一月十一日硃口途次奉

上諭大學士公長齡前命往回疆督辦軍務著仍授
爲揚威將軍軍營大小官員悉聽節制等因欽此

又

奏繳

殊諭奉

殊批覽奏深慰朕懷佇望重奏膚功再膺懋賞我君
臣共享昇平之福也欽此

又大泉途次具

奏接長清咨來奏稿稱俟甘涼肅官兵到齊再爲

卷四
三
整隊前進等語臣思伊犁等處官兵九千餘名

已於十月初間齊抵阿克蘇如全力由大路前

進刻下定已解圍前此分兵已屬示弱於賊若

再遲延喀英二城恐難固守臣實萬分焦急當

卽飛札由八百里行知胡超等務卽刻日帶兵

速進奉

硃批與朕同心者卿也洞達機宜者亦卿也其奈道

遠音遲終歸鞭長不及之歎耳欽此

又奉

批諭覽卿所奏與朕意符合欽此

二十四日蘇巴什溝途次具

奏接據哈豐阿等信稱於哈拉布扎什地方大獲
勝仗卽馳抵英吉沙爾賊已全竄卡外等語查
英吉沙爾與喀什噶爾相距不遠乘勝追援刻
下定已解圍臣已飛咨哈朗阿等務當趕緊設
法擒拏首逆並酌量情形留兵若干外餘悉就
食葉爾羌至此次情蘭回子白帽回子安心從
逆卽遵

旨一律勦洗

同日具

奏接據楊芳來信並鈔錄摺稿及扎隆阿原信情節種種支離如伊薩克果有其事何以扎隆阿信中只有由於內有勾結一語解圍後扎隆阿既不具摺馳奏僅遣一民人及回子二名前來送信更爲可疑查常奉清如係漢奸則此次起釁根由及勾結情形自可就其詢問臣已飛咨長清卽速差人將常奉清帶赴前來奉

硃批老成謀國可嘉可喜欽此

又奉

硃批卿料此事又與朕意相符所謂同德同心者其在是乎欽此

同日接奉十月十四日

上諭長齡將次出關邊外天氣沍寒著賞給黃裏貂皮馬褂一件青白狍皮袍一件以昭眷注欽此

又奉

上諭喀什噶爾英吉沙爾二城待援甚急容安儘可

趕緊進發震懾兵威乃觀整坐失事機此其罪一
又奏稱軍務移步換形不可冒昧輕進顯係畏葸
不前藉詞支飾此其罪二和闐本無賊匪乃容安
以有用之兵轉於無賊之處繞道行走以致耽延
時日無謀無勇措置乖方此其罪三伊犁等處官
兵並非爲阿克蘇烏什防守之用乃容安欲俟分
撥防堵該二處再行前進不知輕重緩急坐擁重
兵虛糜糧餉此其罪四種種乖謬喪心昧良實堪
痛恨前已降旨將容安拏問著長齡卽行知沿途

截回派員押解至阿克蘇長齡到彼後卽行提訊
容安逐層細究其意何居應如何治罪之處著嚴
審明確定擬具奏等因欽此

十二月初二日庫爾勒具

奏刻已二城解圍

臣

現飛咨哈朗阿楊芳等查訪

但係從逆回莊卽應痛行勦洗不可姑容其較
遠回莊實無從逆形迹者亦不得稍涉擾累此
內如有從逆伯克阿渾實係知情預謀者卽遵

旨解京訊辦計現在應辦事宜已開單飛咨哈朗阿

等按款速爲查辦此時台路已通大局已定所
有後起官兵自應全數裁撤奉

硃批均屬詳備欽此

初八日庫車途次具

奏暫停烏魯木齊運糧並將駝隻協濟阿克蘇轉
運奉

硃批所辦是欽此

十三日行抵阿克蘇

十九日具

奏遵

旨指示容安罪款四條定擬如律

同日具

奏連日詢據布魯特毛拉胡達呢雜爾及托胡達伯克並色里木等僉供實不知有伊薩克勾結情事又據伊薩克供稱前往喀什噶爾投信聞得城中大小伯克及城外遞瓜酒之黑帽回子盡被城中殺害與扎隆阿所奏迥不相同難保其不無迴護前愆轉受兵民挾制因而巧爲彌

縫現在重圍甫解更恐另生他故相應請
旨將喀什噶爾叅贊大臣扎隆阿卽行解任奉
硃批好極好極能如此不愧朕推心倚任矣欽此

又奉

硃批卿之心卽朕之心疊次所降諭旨接奉後卿自
知矣欽此

二十二日接受揚威將軍印信並領到

御用黃裏貂皮馬褂青白狻皮袍各一件

二十四日具

奏喀什噶爾回衆一聞大兵踵至零星逃匿臣已

飛咨哈朗阿等詳查如有實在從逆回莊卽派
員帶兵前往痛勦斷不敢稍有姑容如果無需
兵力卽當分別辦理庶良回亦無擾累所有著
名賊目誠如

聖諭大兵一到卽紛紛逃竄殊爲可恨臣現已密飭

阿奇木等懸賞購線設法擒拏務期弋獲以絕
根株

十一年辛卯七十四歲

正月初五日接奉

批迴謝

恩摺奉

殊諭別卿以後中心戀戀當茲瑞雪迎春翹首西望
願卿春祺錫羨一切善後妥速辦竣來京面晤與
朕永享昇平之福也欽此

十五日具

奏喀什噶爾勦撫事宜已經辦有端倪臣已飛咨

哈朗阿等確將各回莊分別查辦俾民回早就

安業其逃竄出卡之逆犯並宜設法購擒相機
妥辦至伊薩克一案前經

奏明提至阿克蘇審辦屢次咨催迄今尙未起解
連日訊據富隆阿常奉清所供是伊薩克謀逆
尙無確據而扎隆阿辦理錯謬已屬顯然若祇
臣在阿克蘇定讞恐無以折服其心相應請

旨將伊薩克全案解京

欽派大臣審辦臣卽於十七日率同桂輪起程回京

奉

硃批卿非朕欽派之揚威將軍乎朕之待卿推心置腹卿何必心懷芥蒂稍避嫌疑一秉大公遵旨審辦爲是無須費此一番舉動也欽此

又移交叅贊查辦各件清單奉

硃批此皆卿應辦之事不當移交叅贊等因欽此

同日具

奏前奉

諭旨此次逆回滋事起釁根由該將軍明查暗訪務得確情據實具奏等因欽此臣抵阿克蘇後詢據

布魯特比托依莫特胡達伯克阿里雅爾伯克
胡達密雜爾毛拉並色里木愛孜木沙等僉供
浩罕安集延由於抄沒貨物驅逐出卡因此懷
恨勾結等語又傳問在阿克蘇居住十年以外
之安集延備述驅逐時悲痛流離情狀甚苦更
爲歷歷如繪又據阿克蘇烏什葉爾羌和闐各
大臣咨覆均屬無異又據胡超稟稱喀什噶爾
輿論亦屬相同復將各供詞互爲參核顯係安
集延因遭驅逐無以爲生屢次乞恩而扎隆阿

竟不據情申奏以致日復一日憤恨愈深遂與
浩罕狼狽爲奸勾結布魯特助逆此次入卡滋
事起覺之端實由於此此外並無別項情弊奉
硃批誤國肇衅罪有攸歸欽此

同日具

奏酌量裁撤兵數並各城採買糧食以資接濟奉
硃批覽奏均悉欽此

同日具

奏此次伊犁挑派進援民勇道勇二千名請查照

上次成案俟旋回伊犁分賞銀兩各給執照免
罪釋回

二十一日拜城途次

奏謝領到

御書福壽字各一方並賞給大小荷包銀鏤銀錢食
物等件

二月初三日吐魯番具

奏接奉

諭旨令臣審辦伊薩克一案奏結後仍馳赴喀什噶

爾將現在應辦事宜及善後章程詳晰籌度定議具奏再行回京等因欽此

臣

思現在口外大雪封

山諸賊目匿跡潛蹤一時採訪不能得實喀什

噶爾既有兵一萬五千餘名足資防守至善後

一節諸臣條奏其中皆有可採

臣

雖有一得之

愚然頭緒紛繁總須到京面陳恭候

聖裁庶得長治久安之要伊薩克一案據現在情形而論是扎隆阿辦理始而錯誤因而掩飾終於執謬勢必難就輪服合無仰懇

天恩仍准臣卽速進京早籌定局

十五日哈密途次

奏謝接奉

硃諭三載考績激揚鉅典大學士公長齡中外宣勤
懋著顯績茲又再莅回疆著加恩交部議敘等因
欽此

同日具

奏奉

上諭據哈朗阿等奏稱檄諭浩罕要人一條本屬體

制惟博巴克一犯浩罕恃爲謀主設竟無覆報或
抗言回答轉於大體有礙著長齡將是否檄諭一
層會商妥辦等因欽此查向來遇有應行外夷之
事歷須頒發檄諭况此次該逆夷勾結入卡滋
事斷無置之不問之理而博巴克一犯曾任四
品伯克尤爲罪大惡極必應飭令送出明正典
刑方合

天朝體制無論該夷如何回答或竟無覆信此時若
不嚴行檄諭殊覺示弱臣現已撰擬清字檄諭

一道一面錄呈

御覽一面卽譯寫帕爾西回字鈐蓋揚威將軍印信
移交哈朗阿等鈐印飭發

二十五日肅州具

奏欽奉

上諭前經降旨該將軍赴喀什噶爾自己折回俟接
奉准令回京之旨方准起程回京等因臣思此時
辦理善後若不將通盤局面大爲變通終歸無
濟然善後之萬全實難而善後之關係甚鉅臣

一已管窺之見殊難信心並恐精力不到思慮未周而口外又無可商之人是以急欲面求

訓誨今奉

諭旨嚴切不敢再行東進茲於二十四日行次肅州

適臣舊痔復發卽在此暫住調養奉

上諭該將軍務加意調攝一俟就痊卽行起程等因

欽此

又奉

上諭長齡接奉此旨無論行抵何處卽已進關必須

迅速折回欽此

又奉

上諭朕思此事長齡有一人商辦更可計出萬全現在添派玉麟會同妥辦長齡是其專責應善體朕心斷不可稍存推諉等因欽此

同日密

奏善後事宜節略一正名一據險一斂兵一屯田一節帑一北路添兵一調濟土爾扈特一設地方官一設稅一開鼓鑄奉

諭旨所議各條不爲無見等因欽此

三月十八日啟程出關桂翰仍隨行

五月初九日馳回阿克蘇

十五日

奏謝領到

御賜平安散錠子藥

同日具

奏請將前奏各省解到存留甘肅藩庫軍餉項下
照數撥解阿克蘇以資接濟

六月二十九日會

奏審明扎隆阿奏叅伊薩克差玉素皮與浩罕通
信一款玉素皮在逃未獲無從質訊賊目玉素
普寄書伊薩克一款查其譯呈原字非專給一
人書之真偽無憑究辦伊薩克與布魯特比巴
哈提拜占帕拉特密謀不軌一款所奏供證叛
逆回衆極口呼冤僉稱並無所聞謊報卡外情
形一款據回務章京福奎呈出五六月各探
報並無欺隱八月十三日伊薩克面請帶兵神

情有異扎隆阿飭令看守十五日毀近城民房
賊誤認舉火內應大隊撲城一款訊據衆供八
月十二日拆毀近城民房十三日賊到城下十
四日將伊薩克看守與原奏日期不符柴窖內
搜出身帶九龍袋回子突起傷兵一款訊據兵
丁閻喜供稱在院內搬柴檢得空皮袋一具並
無藥箭實無回子傷人之事其設計阻兵頓兵
不進夾牆地窖藏有器械各款訊據一同帶兵
之防禦富隆阿馬甲哈隆阿及在阿奇木署內

居住之民人梁大受各供俱無其事緣伊薩克
上屆軍務懋著忠勤迭膺爵賞卡外諸夷旣恨
其協揜張格爾又惡其妄自尊大不與卡外交
通安集延亦以被抄被逐歸怨伊薩克九年冬
兵民謀搶伊薩克事洩扎隆阿將爲首六人奏
明正法遂有驅逐流民之舉民衆疑爲伊薩克
之意積忿已深迨伊薩克帶兵禦賊扎隆阿諭
令撤回有自賊營逃回述賊言伊薩克內應者
一時傳播城市兵民藉口附和以爲非殺伊薩

克城不能守適有避亂奔入新城回衆城內兵民指爲賊匪肆行殺掠扎隆阿不能彈壓遂將伊薩克看守以安衆心賊退圍解扎隆阿外受兵民挾制內聽幕友主持冀殺伊薩克一人以掩不能約束兵民之罪遂以勾結謀逆列款入奏臣同玉麟悉心詳審究出扎隆阿捏奏真情並委員周彭齡商同捏奏章京金齊賢迎合承審通事阿布都吉里教供誣證按律分別定擬

奉

上諭若非卿二人公忠體國何能平反此案使內外
夷回懾服可嘉之至等因欽此

同日會

奏臣前此密陳節略實因昔年邊地用兵如金川
之索諾木回疆之布拉呢都霍集占以及張格
爾皆著名逆首殲厥渠魁洵武功之鉅典浩罕
安集延本烏合之衆不必深入窮追只宜防守
有備待其至而痛勦之即可寒夷匪之膽諸臣
所言添兵分駐廣招佃種似屬可行但未親歷

其境使兵勢聯絡如一亦有不能逕行之處喀
城地處極邊外夷由卡至城僅百餘里後路距
阿克蘇二千餘里前此張格爾之亂喀城被圍
援兵不至四城先後失守可爲炯鑒今議善後
豈可復蹈前轍致令叅贊大員坐困重圍不能
制人而爲人制查西四城現有滿漢防兵六千
餘名即使每城酌增賊匪倉卒入卡由各城紛
紛檄調孤軍遠涉不能迅至設使賊匪抄截其
後其患豈可勝言臣稍知用兵情勢爲今之計

惟有量移統鎮以資控馭酌添兵力以壯聲威
叅贊總理八城葉爾羌爲扼要適中之地應請
移駐於此該處地廣戶繁可以多駐官兵距喀
什噶爾六站外夷進卡接見在不遠不近之間
足資控制其幫辦大臣仍照舊例專管本城事
務再將和闐領隊大臣移駐一員聽叅贊調遣
喀什噶爾留換防總兵一員在彼統兵駐守英
吉沙爾仍駐領隊大臣一員再於葉爾羌阿克
蘇適中之巴爾楚克一帶添駐總兵一員以爲

樹窩子咽喉鎖鑰則六城相距均不過數百里
聲勢易爲聯絡和闐僻在一隅祇留領隊大臣
足資辦理喀什噶爾駐兵作爲前敵如遇零星
賊匪不難立即擊退若有大股賊來稟報叅贊
發兵援剿英吉沙爾駐兵爲中權接應設有賊
匪入卡兩城足以抵禦再由葉爾羌撥兵應接
巴爾楚克鎮兵續援該處通樹窩子之路復有
官兵把守賊不能抄襲後路東四城均可無虞
叅贊居中制外調度俱可裕如嗣後邊防安靜

所增兵額不妨隨時抽撤此時擬增防兵應需糧餉請於各省綠營兵額暫裁百分之二節省銀兩足備添兵之費俟屯田著有成效足資兵食再補還百分裁二之數再請將大黃茶葉等物仍准外夷通商交易以示羈縻庶浩罕安集延等懷德畏威不敢復犯邊境奉

上諭著照所請辦理欽此

七月初一日自阿克蘇起程

二十四日抵喀什噶爾大營

二十七日會

奏浩罕先後差來頭人密孜依斯邁提毛拉愛克木等三人呈遞親供申訴五年以來斷絕貿易之苦累籲求照舊通商別無他意臣等公同接見詰以滋事之罪責令縛獻賊目送出裹去民回如能遵辦必爲奏懇

大皇帝恩施准令通商納貢據該夷使等稟稱尙須遣人回去告知該伯克定奪並情願留一人在此候信當卽照例筵宴賞資令其旋回俟稟覆

到日再行請

旨定奪

九月初四日會

奏欽奉

上諭究竟將來如何情形方可裁撤及裁撤之後又將如何辦理始臻妥善等因竊思用兵之力先貴得兵之心欲守邊之兵實心出力莫如屯田一法此時先將西四城可種之閒地招民開墾有願携眷者聽之其回子地畝亦不禁其租給耕

種現經壁昌出示招諭妥爲籌辦但能試種有
效人人知地利可守則安家者漸多有願入伍
者卽准其充食錢糧收一眷兵卽撤一換防兵
額其防兵在戍旣久有願徙眷安家者亦聽其
便種地之人日多挑兵之人不患其寡所謂以
回疆物產供回疆兵精將來辦理抽撤防兵實
無有善於此者其中詳細章程容另妥議

同日會

奏查道光八年奏案將涼州改鎮爲協移該處總

兵作爲喀什噶爾換防之缺今又於巴爾楚克
添設總兵一員陝甘地方緊要涼州向係重鎮
擬將涼州鎮總兵仍改歸原地至喀什噶爾巴
爾楚克總兵二員卽由陝甘實缺總兵內不論
滿漢擇其熟諳行陣平日訓練有方者揀派前
來如一時難以派防或卽揀選堪勝總兵之副
將請

旨賞加陞銜署理換防總兵

十七日會

奏臣等親歷各城熟察民情同情詳晰酌定叅贊

大臣移駐葉爾羌總理八城節制兩鎮應請兼
提督銜其幫辦大臣一員仍照舊專管葉爾羌
本城兼轄和闐再裁和闐領隊大臣缺移駐葉
爾羌作爲領隊大臣專管滿營操防及各卡倫
事務請定爲新設葉爾羌滿營防兵一千名該
城本有綠營防兵一千二百五十五名添設防
兵二千七百四十五名共滿漢防兵五千名喀
什噶爾將現設之幫辦大臣缺改爲領隊大臣

仍留原駐馬隊五百名其現設綠營兵三千八百二十五名請裁撤三百二十五名留駐三千五百名歸總兵統領操防共滿漢防兵四千名英吉沙爾仍駐領隊大臣一員於現設綠營防兵四百名之外請添設六百名共兵一千名和闐領隊大臣一員請改爲辦事大臣於現設綠營防兵二百三十三名之外請添設二百六十七名共兵五百名巴爾楚克爲新設要鎮換防總兵一員駐兵三千名僅敷操防請添屯兵五

百名共練營兵三千五百名其印房等處各官
應將喀什噶爾葉爾羌兩城現設章京筆帖式
互相移易並請復設葉爾羌經牧章京一員專
司牧事

同日

奏謝領到

御製文初集全函

二十八日會

奏請嗣後各城印房回務章京缺出如果駐防筆

帖式內實有通清漢文理而能事者准援人地
相需之例保奏陞補如駐防無人仍由六部司
員內揀派前來其各城糧餉章京六缺均請由
京揀派賞銜起用廢員以符舊制又請南路各
城印房糧餉局委筆帖式照伊犁之例定爲五
年報滿除五年內得有陞階者仍照舊辦理外
其餘各委筆帖式由該管大臣確核如係勤奮
出色者出具頭等考語准留頂戴咨回原營作
爲年滿委筆帖式以驍騎校酌補其照常當差

者出具二等考語摘去頂戴飭回原營當差其
差使懶惰者隨時咨革以昭激勸又請各城換
防官兵於班滿時准於舊班中酌留十分之三
以資駕就其滿營換防官兵亦一體辦理又請
三品阿奇木伯克九缺及大城之阿奇木伊什
罕伯克仍令迴避本處自三品至五品伯克缺
出由叅贊擬定正陪奏補其各城莊六品以下
伯克缺出均毋庸迴避本處由該大臣擬定正
陪咨請叅贊補放毋庸連人送驗以順同情又

請將烏什五品阿奇木伯克一缺改爲四品再酌添五品伊什罕伯克一員六品噶雜納齊伯克一員七品都管伯克明伯克各一員並現有六品以下伯克七員共十一員分理屯局諸務庶有責成又請將各城煎熬硝磺仍照舊例由阿奇木伯克採辦交納以歸實用奉

上諭著照所議等因欽此

同日會

奏葉爾羌喀什噶爾英吉沙爾三城均有卡倫應

照道光八年奏案仍用綠營員弁駐守

同日會

奏請將道光十一十二兩年喀什噶爾回子應交
布疋暫行停徵免其交納奉

旨允行

同日會

奏烏什舊有滿營防兵一百四十名於道光八年
奏撤上年又將新添之綠營防兵奏撤五百名
現僅存綠營防兵一千二百五十二名該處西

南北卡外均係布魯特游牧路逕叢雜實爲東
西城險要邊地請復舊制設滿營防兵一百四
十名並將裁撤喀什噶爾之綠營防兵二百二
十五名移駐其地共新舊滿漢防兵一千七百
一十七名以供差防

同日准軍機處行知內閣奉

上諭本年朕五旬萬壽大學士公長齡係御前大臣
赴喀什噶爾籌辦善後事宜尤宜特沛恩施長齡
著晉加太傅以示錫羨推恩優加勲勤至意等因

欽此

同日奉

旨長齡著於銀庫實存飯銀內賞給八百兩欽此

同日會

奏前奉

上諭各城改設各官必須慎揀得力之員該將軍久
駐回疆各員賢否自必深悉著詳晰開單保送等
因欽此謹出具切實考語分別保

奏均奉

旨照單簡放

十月二十九日會

奏查明阿克蘇葉爾羌兩城接壤戈壁道遠自阿克蘇屬之薩伊里克至齊蘭實有一百八十里擬於適中之沙井子分設腰台一處卽令齊蘭台筆帖式兼管自齊蘭台至葉爾羌屬之雅合庫圖克實有一百四十里亦擬於適中之色瓦特分設腰台一處卽令雅合庫圖克台筆帖式兼管並各派外委一名字識一名兵丁五名牧

馬十五匹牛十隻回子二十戶回子馬二十四

同日會

奏此次各城新添官兵應需糧料請將葉爾羌本年阿克蘇等城官員加增養廉鹽菜折抵糧九千三百五十五石並前經奏明以銀折充正項糧九千石二共糧一萬八千餘石自本年秋季爲始改徵本色以資兵食此外不敷糧石俟壁昌另行籌款辦理至各城大臣官員歲支加增鹽菜銀兩應請歸於各該城經費項下動支

十一月十四日准軍機大臣寄十月十一日奉
上諭發去人蔭一勛賞給長齡玉麟祇領俾資調攝
以示優眷等因欽此經兵部隨文遞到具摺

奏謝

同日會

奏欽奉

諭旨於回戶內挑選兵壯時加訓練兵丁出缺卽可
於回戶內挑補俾得自保身家防禦外患等因
臣
等查喀什噶爾葉爾羌兩城舊有額設回兵各

五百名向來回戶挑補兵額祇圖免納錢糧並不操習技藝間遇徵調率皆畏縮不前全仗官兵爲之捍衛若於回戶內挑選兵壯勤加訓練俾得自保身家防禦外患自可收以夷制夷之效第回性愚懦游移挑補防兵以後能否嫻熟技藝悉成勁旅其情形尙難預必且疊遭兵燹甫經陸續招撫歸業其生計尙形拮据擬俟元氣漸復卽將舊額補足奉

上諭所慮甚爲周到著照所議辦理等因欽此

十二月十一日會

奏欽奉

諭旨令臣等明示浩罕許該夷仍舊通商其茶葉大

黃俱在所不禁並免其貨稅至縛獻賊目送出
民同一節竟可置之不問仰見

聖謨廣大曲示包容臣等從此遵辦一切較有把握

連日通盤核計擬酌減巴爾楚克防兵五百名
葉爾羌酌減滿洲兵五百名綠營兵一千五百
名經費可期稍節而輕重尙屬適均奉

上諭著卽照此次核定額數咨明楊遇春作速飭派
前往等因欽此

同日會

奏據和闐阿奇木依斯瑪依爾等呈請歲捐糧一
千二百石以資添兵口食烏什阿奇木木薩等
呈請在寶興屯工地內捐築回城令屯兵歸城
操演每歲額交糧石卽由回戶照數交納又西
四城歲繳賦錢六千七百餘串除搭放外每年
存剩普爾錢五千餘串此次減定暫添防兵僅

止五千餘名需餉不過十萬兩若將存剩賦錢以二百二十文易銀一兩可充經費銀二萬三千餘兩此項存剩賦錢向係各城備貯充公按年報銷用款不一不皆散在兵衆若將五千餘串全放兵餉則散有常期城市錢源益加充裕不致錢貴銀賤至安鑪鼓鑄祇阿克蘇一城普爾錢文行用止在回疆額鑄之錢與歲俱增輒轉流通總不出八城地面斷無短絀之虞奉

上諭俱著照所議辦理等因欽此

二十四日會

奏喀什噶爾西北面城垣角樓已加培包築英吉
沙爾城垣亦經周圍加高加厚整砌垛口挖掘
深濠添築女牆葉爾羌城東北與回城相距適
中之地擬添築滿城一座建蓋兵房爲領隊大
臣駐劄之所又巴爾楚克樹窩子通牌斯巴特
東西擬築兩堡中設塘汛撥兵分駐均卽次第
興辦奉

硃批均如議行欽此

同日具

奏查明喀什噶爾上年被賊決水灌城龍神顯著
靈祐請

勅賜封號

是年子桂翰調補戶部右侍郎尋調吏部右侍
郎

姪桂芬陞山東登萊青道

十二年壬辰七十五歲

正月初二日自喀什噶爾起程

二十六日抵阿克蘇

二月初二日

奏謝領到

御賜福字壽字荷包銀錢銀鏤蓮子葡萄等件

同日會

奏開墾屯田現據喀什噶爾大營駐扎處所名喀什赫依延袤二百餘頃已招五百餘人分認耕種俟將來逃散回戶歸來卽以現存叛產照數撥給嗣後再有承種民人於大河拐附近荒地

酌量分撥葉爾羌境內毛拉巴什賽克三一帶
荒地俟巴爾楚克接連樹窩子等處築堡設汛
後廣爲招種其修築引水牛具籽種按例徵收
各事宜須試種一年再由叅贊大臣壁昌詳議
章程

二十二日准吏部咨開十一年十二月初九日

內閣奉

上諭長齡著管理兵部事務等因欽此

同日會

奏浩罕遣使懇求四事情願抱經盟誓具表請罪
從此永遠恭順臣等愚昧之見如通商免稅之
事前已欽奉

恩諭准令進卡貿易免其納稅卽可照允所求至派
設夷商頭目一事自應仍舊安設又討還田產
茶葉之事查此項田產早經變價充公計銀一
萬餘兩爲數無多自應示以大方援照伊犁

賞還哈薩克王江霍卓入官茶葉之案照數給發惟
釋回發遣回犯一節查張格爾案內或緣坐家

屬或被脅從犯均經發遣爲奴此事原不應該
夷干預但據所稟各回犯逃赴該處沿門乞食
窮苦堪憐溯查乾隆年間平定回疆時亦有發
遣緣坐人犯嗣蒙

恩旨釋回此等無知回衆可否援照釋回之處臣等
未敢擅便伏候

聖裁茲撰給浩罕伯克回諭一道繕呈

御覽

同日會

奏前奉

諭旨張格爾在布噶爾所屬之布哈拉地方所生一子現已長大是否確實著確切查訪等因欽此

臣

等詢據依山阿吉稟稱張格爾之妻係浩罕人止有一子名布素魯克又名阿里本格爾現年十歲在浩罕近處回莊隨母同住種地度日隨從並無多人並未聞張格爾有在布噶爾生子之事又稱張格爾之兄玉素普有二子長名推列年十八歲次名伯巴年十一歲張格爾之弟

巴布頂業經身故其長子阿里雅爾早已解京
尙有次子名納斯爾年十一歲素有瘋病皆在
浩罕居住復據作霍爾敦稟稱近年回衆見霍
卓無能轉因其受害皆無崇奉之心現在浩罕
通商其後裔亦不能煽惑勾結

同日會

奏前蒙

勅部撥銀二百萬兩茲查善後事宜已竣大營暫時
供支已足敷用是前此由陝甘總督先撥之銀

一百萬兩即可節省惟計目下均已解運在途擬將此項撥給葉爾羌銀三十萬兩如善後尙有需用之處卽由此內動支所剩銀兩儘數封貯其餘銀七十萬兩撥阿克蘇二十萬兩伊犁三十萬兩烏魯木齊二十萬兩均作爲儲備專款不得濫行挪用至現存甘肅餉銀一百萬兩卽咨明陝甘總督全數封貯司庫作爲新疆備用另款非有要需不得調撥

三月十九日會

奏請將阿克蘇收到內地駝隻設立駝廠分派官
兵躡勘水草茂盛之處牧養葉爾羌巴爾楚克
共撥駝八百隻每屆出廠時以四百隻分各軍
台運送布棉以四百隻分撥運送糧石柴薪喀
什噶爾撥駝二百隻以備馱運柴薪阿克蘇撥
駝五百隻卽以運送冰嶺布棉硝磺所有派牧
兵丁作爲廠兵免其差操各廠駝隻照伊犁特
穆爾廠之例不取孳生亦不准倒斃除運送官
物仍給盤費外空閒之日准各廠兵自行營運

定以限制不得潛越庫車以東所得腳資即可
添補繩索鞍屐不淮另行開銷每屆年終各城
將存駝數目咨報叅贊查覈勿任日久滋弊如
此辦理既不致有累回衆而厥兵有利可圖自
必盡心牧養設遇緩急隨調隨至可期迅速其
餘駝一千隻卽咨交烏魯木齊都統收明按照
舊例一體牧養聽撥使用

同日會

奏查卡外諸夷向來進卡貿易無論所販紬布皮

張以及馬匹牛羊各項均定以三十分抽收一分雖係變價充公計數實屬無幾現在浩罕免罪通商並邀

恩免稅其葉爾羌喀什噶爾卡外各部落暨布魯特等進卡貿易事同一律可否准其一體免稅之處伏候

聖裁尋奉

允行

四月初九日具

奏欽奉

上諭浩罕伯克遣夷目遞稟所求四事尙屬可行第
四條亦照議允並另添兩條繕交該將軍閱看後
應如何發交浩罕之處酌量辦理長齡現在善後
事竣著卽起程回京等因欽此 臣當卽將奉

發下諭帖遵卽照譯回字鈐蓋揚威將軍印信寄交
哈朗阿等派人送往該夷自必更加感激約計
本月內卽可具表到來從此永靖邊隅洵足上

紆

宵旰

臣

於拜摺後卽率桂輪起程所有辦理軍需及

善後一切文卷現已備文解赴伊犁將軍衙門

交收存案備核奉

硃批計八月前後晤面朕欣喜待卿矣欽此

六月初八日抵甘肅省

十一日會同陝甘總督楊公遇春具

奏前奉

上諭據御史達鏞奏新疆換防章程請加變通一摺

著臣長齡與楊遇春晤面時悉心妥議具奏等因

臣等現查回疆統計滿漢防兵一萬數千名若盡改駐防不但目下多增糜費將來兵回滋擾流弊不可勝言該御史祇知改駐防以免輪派之繁而不知改駐防實非因地制宜之道仍請循舊制以免紛更

同日具

奏據哈朗阿咨稱大營留駐征兵須俟防兵到後方能全撤合計尙需銀二十萬兩臣查所需軍餉係應按時支發若由內地咨調不但緩不濟

急且亦多糜脚費現已咨明壁昌卽在葉爾羌
封貯之三十萬兩內就近撥解銀二十萬兩俾
得無誤軍精並擬於阿克蘇封貯之二十萬兩
內分撥銀一十萬兩解交壁昌封貯計阿克蘇
封貯銀十萬兩葉爾羌封貯銀二十萬兩均足
以資儲備

二十六日行抵山西蒲州府永濟縣駐辦奉
旨交查蒲灘鹽地情形

二十七日先令桂輪起程回京當差

二十九日接奉

上諭浩罕伯克邁買底里遣使進表已降旨准令入
卡貿易免稅納課復諭哈朗阿等嚴飭公平交易
諭令壁昌等隨時防範所有諭旨二道並傳知浩
罕伯克諭帖暨哈朗阿原奏同譯出該伯克表文
一併鈔給長齡閱看等因欽此

七月初七日具

奏永濟縣南北二灘地畝盡屬硝城不能耕種祇
可曬鹽如聽民曬官銷挪引分辨防範難周更

易滋弊自上年查禁私曬鹽引已形暢銷而津貼僅止三年蚩蚩愚氓任其失業殊非持平之道據河東道韓文顯稟稱商人情願捐輸以商力之有餘濟小民之生計永遠代賦津貼事屬可行自應准其將代賦銀五百四十三兩零津貼銀九千一百五十兩零按年照數呈交道庫轉發永濟縣按戶分給責令蒲州府永濟縣實力稽查如收穫有成再將代賦津貼銀兩按畝劃除庶民力不致竭蹶而私曬亦可杜絕洵於

裕商便民兩有裨益奉

旨照議辦理

二十日行抵山西省城

八月初一日具

奏查明趙興德因伊父趙進義以糧書違例徵收
錢糧呈控被押一時情急赴撫蒙點放號礮冀
圖動衆應比照刁徒挾制例發近邊充軍至上
年十二月十五日撫臣阿勒清阿詣廟行香回
署有農民數十人執持農器以浮收錢糧攔輿

面稟經該撫臣擇其年老數人諭知此係嘉慶二十五年奏定章程該鄉民均甚悅服各散回村並無擲繳犁鋤之事

又

奏訊明把總劉正因在榆次人地未宜經撫臣將缺另以閩化龍補授劉正恐不能補缺情急赴撫署申訴擅敢將堂鼓敲擊應將劉正革去把總比照刁徒挾制例發近邊充軍據供母老丁單可否准其留養恭候

聖裁

二十五日具

奏審明太谷縣八品職銜孫阜昌價買五台縣青
白石鋪砌堦沿欄杆被人控告孫阜昌赴臬司
衙門呈訴批委陽曲縣知縣李聯蒙審問李聯
蒙藉案勒索賊銀三萬兩因外間噴有煩言遂
將原贓退還並捏寫捐修城工呈詞向孫阜昌
威嚇畫押朦蔽各上司並串囑案內人證飾詞
狡賴巧避罪名並究出過付欺騙並唆訟賄私

及書役得財共雜費銀一萬五千兩屬實又續
訊出藉案索贓之太谷縣知縣王渠事後受財
之署太谷縣知縣王承慶及典史周舞暘等均
各論如律

九月初六日到京

初七日覆

命奉

上諭大學士公長齡年逾七旬著加恩於該管旗分
各衙門應行帶領引見之日俱免其帶領以示體

恤勲者至意欽此

十月十九日奉

旨管理戶部三庫事務

十一月十三日奉

旨補授總理行營大臣管理善撲營虎槍營事務

十八日奉

旨補授總諳達

是年子桂輪充崇文門副監督

姪桂芬調山西歸綏道

十三年癸巳七十六歲

五月二十七日奉

旨管理戶部事務

是年八月初十日孫麟慶生

姪桂芬歿於山西歸綏道任

十四年甲午七十七歲

正月初二日奉

旨紫禁城內乘轎

二十二日奉

殊論三載考績大學士公長齡功宣絕域同德同心
著交部議敘等因欽此

三月初三日奉

旨佩帶理藩院並內繕書房印鑰

是月

上詣

西陵

命留京辦事

十月十八日

册立

皇后

命大學士公長齡爲正使持節

册封

十五年乙未七十八歲

正月十八日奉

上諭長齡於浩罕夷使呈遞稟詞並不正詞曉諭絕其妄竇率將原呈代奏並受所餽土物葡萄一盤殊屬不合著交部議處經部議降三級調用奉

旨改爲降四級留任仍革退御前大臣毋庸管理戶部事務

二月十五日

命管理理藩院事務

二十一日

命署鑲白旗滿洲都統

三月初六日

命署理步軍統領事務

命充大挑大臣

四月

命充

殿試讀卷大臣

閏六月

御賜平定回疆戰圖全分

七月

命充崇文門正監督

八月初十日

命兼署禮部尙書

是月

上詣

西陵

命留京辦事

十月

命兼署正白旗滿洲都統

十六年丙申七十九歲

二月

上詣

西陵

命留京辦事

四月

命充

殿試讀卷大臣

八月

命署鑲白旗滿洲都統

九月

命管理戶部三庫事務

十一月

命充

玉牒館督催

調補鑲黃旗領侍衛內大臣又奉

旨侍衛處印鑰着長齡佩帶欽此

十七年丁酉八十歲

正月初一日奉

旨大學士公長齡宣力 三朝敷歷中外年登八秩
氣體康健著加恩賞穿四開襖袍用昭優眷欽此

二十二日奉

殊論三載考績爲激揚大典大學士公長齡宣力多年年登八十而精神強健著加恩交部議敘欽此
一七月初七日奉

旨大學士公長齡年登八十精力素健茲因肝氣病症驟難復元懇請開缺調理長齡著毋庸開缺不必限以假期所管各項差使現已分別改派署理俾得安心頤養速就痊可統俟精神照常後再行銷假以示體恤欽此

九月初八日奉

旨大學士公長齡前因肝疾舉發奏請開缺當有旨
令其安心調理不必限以假期茲據奏稱病勢難
望速痊瀝請開缺察其情詞懇切實以職任公事
爲重惟念長齡年經八秩精力素健若遽准致仕
朕心實有所不忍長齡仍著無庸開缺其所管理
藩院事務及閱兵大臣現已派人署理俾得靜加
頤養速就痊可不必限以假期統俟精神復元再
行銷假當差以示體恤欽此

二十九日奉

旨大學士公長齡前因肝疾舉發屢請開缺迭經降
旨諭令安心調理不限假期現已數月尙未痊可
朕心實深廛注十月初二日朕親往視疾用昭恩
眷欽此

十月初二日

親臨視疾頒賞

御用搬指荷包玉珮金錢金小如意並面奉

溫諭增福增壽靜心緩養不可著急欽此

十一月十七日奉

旨大學士公長齡本月十八日八十生辰現在雖未
進內當差轉瞬春融頤養翼臻強固且宣力多年
壽臻大耄加恩晉封一等威勇公以示優異勲者
至意欽此

十八日寅刻蒙

欽差武備院卿豫堃齋到

頒賜

御書繪閣勲者匾一面

御書嘉乃壯猷資勩相錫茲蕃祉念戎公對一聯

御書福字一方壽字一方

御書長壽字一幅大毛本色貂盤結冠一頂佛一尊

連龕救度佛母畫像十二軸福壽如意一柄綠玉

朝珠一盤金鑲白玉帶瓦一副

隨手巾束

石青緋

絲五彩四團龍補袪面一件石青緞繡五彩四團

龍補袪面一件藍醬緋絲蟒袍面二件大卷八絲

緞袍袪料四套大卷江綢袍袪料四套小卷八絲

緞袍袪料四套縐綢六件綾六件玉套銅陳設十

五件當卽望

闕叩頭祇領卯刻具摺進內謝

恩仰蒙

召見並蒙

諭令 桂輪 攙扶起跪

溫語優加面

賞荷包三對

御書福壽如意額一幅

十八年戊戌正月初一日子時

壽終正寢

初二日呈遞遺摺奉

上諭大學士公長齡由部曹荷蒙

皇考仁宗睿皇帝簡膺外任洊歷封圻朕御極後特任
綸扉令在軍機大臣上行走乾隆嘉慶年間屢經
出師著有勞績道光六年逆回滋事復帶兵申討
克復四城生擒首逆懋著偉功年來管理部院事
務詳慎勤能克盡厥職中外敷歷無愧贊襄上年

因病陳請開缺未允所請朕特親臨視疾諭令安心調理昨因八十生辰念其宣力多年晉封爲一等威勇公賞賚迭施面加溫諭方冀春融調理就痊用資倚畀茲聞溘逝實深震悼著加恩入祀賢良祠賞給陀羅經被並佛一尊經一冊烟壺搬指各件派奕紀帶領侍衛十員卽日前往奠醊朕於本月初三日親臨賜奠並賞給廣儲司庫銀二千五百兩經理喪事任內一切處分悉予開復應得卹典該部察例具奏其一等公爵著桂輪百日孝

滿後承襲毋庸年終辦理用示朕軫懷耆舊恩賚
有加至意欽此

初三日奉

上諭大學士公長齡歷事

三朝宣勤中外昨聞溘逝悼惜滋深已降旨優加賜恤
令典飾終本日朕親臨賜奠追念遺勳更深悲悅
伊孫麟慶著加恩賞給員外郎俟及歲時當差以
示優眷耆臣有加無已至意欽此

禮部議請祭奠如例

賜謚文襄

十三日奉

上諭大學士公長齡舉殯時著派濟克默特前往賜奠欽此

恭錄

諭祭文

維道光十八年歲次戊戌正月朔越二十有四日丁酉

皇帝遣官禮部右侍郎連貴

諭祭於太傅大學士一等威勇公長齡之靈曰揆文
奮武時惟兼濟之才崇德報功宜有特隆之典課
績久昭於中外推恩無間於初終用沛絲綸式光
筵几爾原任太傅大學士一等威勇公長齡少由
庠序游陟郎曹靖海氛而早左前籌厯節鎮而頻
書上考吏治旣勤於旌鉞武功尤著夫旗常策固
金湯南荆底定勲高鐵蓋西或盪平宣力

三朝一德一心之盛揚威萬里四奇四正之謨在左右
則丹陛攄誠參樞祕則黃扉贊化是用上公秩晉

中禁班崇麟閣圖勲龍章被服載乘而紫纒示寵
飾纓而翠羽生輝詩筵頻頒曾記勲勞之懋經筵
備講益彰啟沃之勤去冬引疾家居親臨問視冀
精神之永固享福壽之延長仍以八秩之辰載錫
重申之命方欲永資輔弼何期遽卽淪徂爰購儲
鏤式頒經被飾終之文宜備世及之禮攸崇於戲
聞鼓鼙而思將帥嘉績維昭撫鐘鼎以卹勲猷哀
榮允至庶幾歆格尙克欽承

恭錄

諭入祀賢良祠祭文

勲高柱石簡編垂不朽之文名勒鐘彝俎豆重維
馨之報偉績既彰於中外殊恩無間乎初終載展
几筵用申綸綍爾原任太傅大學士一等威勇公
長齡忠盡性生折衝才裕初備員於郎署旋奮力
於戎行涉閩海以揮戈鷁舟穩渡登楚山而樹幟
鷲埃無驚洛下皖中疊建連圻之節齊封晉甸頻
移開府之旌傾畿輔而作屏藩鎮邊陲而資保障
爲腹心爲股肱爲耳目翊贊者

三朝峙模糧峙楨榦峙芻菱馳驅者萬里屬以逆回之
潛煽遂率勁旅以長征檄草晨飛水黑沙黃之地
河冰夜合風饕雪虐之天阿克蘇之勝算全操鐵
蓋山之奇功迅奏四城恢復元惡生擒絕域底平
築鰲封以撫衆長纓就繫望象闕以陳俘慰勞而
爰遣郊迎抱見而特隆廷對四采被龍章之服三
花耀翠羽之冠麟閣圖彤丹毫振藻鸞鑣載路紫
綬分輝上公超五等之封元相應三台之位蕃釐
備錫倚畀方隆昨以偶抱微疴親臨存問正期康

豫遂躋耄耄之齡詎料淪殂竟失老成之望沛恩
施以懋賞崇祀典以酬庸於戲功烈昭垂式煥旗
常之績忠誠允著永留貞壘之芬渥爾寵榮尙其
歆格

恭錄

諭碑文

朕惟緯武經文公侯備腹心之寄出將入相宗邦
賴屏翰之人勛相我國家軫前勞而聿歆雕俎用
成爾顯德彰偉烈而特樹豐碑爾原任太傅大學

士一等威勇公長齡性篤忠貞學嫻韜畧初登粉
署俄直樞廷仕歷

三朝溯服官於乙歲身經百戰基勞績於辰年繼而師
建樓船靖八閩之鯨浪親提枹鼓掃三楚之狼烟
爰開府於皖中更移麾於山左惟關隴係邊防之
重必柱石爲保障之資壤接羌夷警威稜於六族
任兼豫晉瞻赫奕於雙旌復資坐鎮乎三邊更賴
宣猷於萬里庶績倚綸扉之贊前籌契帷幄之謀
惟逆裔之鴟張致羣頑之蠢動螳聚連圻之域蜂

屯疏勒之疆爰命將以遣征遂揚威之特簡功高
八陣士盡折衝地復四城將皆用命柯爾坪先覩
其魄瞻甲帳而生威鐵蓋山克成厥勲御午門而
獻捷朕心嘉子曠賚優頒酬庸之典禮特隆抱見
之恩施尤渥爲儀用吉翎飄翠暈之三作會汝明
服錫龍章之四繪像特高於麟閣蕃釐備錫乎螭
坳當疾發於肝陽尙力冀夫頤養眷同心之碩輔
昨用親臨躋顯秩於上公永臻耆耄方期勿藥百
年仍贊松雲詎意云徂一旦竟聞薤露先頒秘器

捧齋特遣乎近臣重泄屬車懋賞遞延於後嗣祔
賢良之祠而彰德錫易名之典以酬庸謚曰文襄
庶昭勲伐於戲聽鼓鞀而思將帥永垂丕烈於稔
庭對典型而念老成尙仰鴻文於表碣

正月二十五日殞於朝陽門外之大黃莊塋次
五月二十五日奉

上諭奕山奏原任將軍入祠一摺原任伊犁將軍長
齡准其入祠欽此

十九年己亥

三月初四日奉

上諭嗣後每次恭謁

東陵禮成後着將原任大學士公長齡一併開列奏請
派員賜奠欽此尋於初七日

派散秩大臣侯施德林赴塋

賜奠

右 先文襄公自定年譜起乾隆戊寅迄道光
丁酉之冬僅得四卷 桂輪嘗以過簡請 先公
謂余一生蒙

三朝恩遇敷歷中外惟於國家事知無不爲爲無不盡
而已豈爲身後名哉特將來例入

史傳不得不粗留梗概以備採擇就 奏言摘要
存以紀年足矣至於前席

召對密勿論思不待紀亦不應紀也伏念 先公立
朝助業人所共知獨家居身教言教 桂輪知識櫛

昧未能仰體萬一計隨節署方在髫年京秩公
羈久疎定省迨先公兩督回疆軍務奉

命隨侍甫得昕夕承訓近年來淀園侍直方期永駐
椿暉詎丁酉歲自夏徂冬夙疴淹劇竟於戊戌

元日棄不孝逝嗚呼桂輪不及再聆先公訓

矣譜爲先公生前手定未敢以一字緣飾致
積罪愆謹接錄戊戌正月初二日以後疊奉

恩旨然未能表揚先德煢懷益滋疚戾矣桂輪謹

記

門下士徐松填諱

門下士顏以煥張中寅恭校